



ATASSUT INATSISARTUNI

18. november 2013

Inatsisartut suleriaasiat § 37 immikkoortoq 1 naapertorlugu matumuuna Naalackersuisunut apeqqutit imaattut saqqummiuppagut:

KNI A/S pillugu Naalackersuisunut apeqqutit

(Inatsisartuni ilaasortat Knud Kristiansen aamma Gerhardt Petersen, ATASSUT)

Namminersorlutik Oqartussat tamakkiisumik pigisaattut ingerlatsivik KNI A/S nioqqutissanik aammalu uuliamik pilersuisutut KNI A/S qitiulluinnartumik inissisimavoq, taamaammat inuiaqatigiit aammalu nunatsinni suliffeqarfiit piumasaqaatigisinnaavaat KNI A/S-ip ingerlanneqarnera pillugu erseqqissumik akineqassallutik, taamaaliornikkut ingerlatat KNI A/S-ip ataani isumagineqartut inuiaqatigiinnut Kalaallinut pitsaanerpaamik ingerlanneqarnissaat qulakkeerneqarsinnaaqullugu.

Tamakkiisumik isiginnittumik apeqqut una akineqaqquarput:

1) *KNI A/S pillugu Naalackersuisut ataatsimut isiginnittumik qanoq pilersaaruteqarpat?*

Periaasissamik annertoorejussuarmik KNI A/S suliaqarsimavoq taasamik “2016-ip tungaanut”

Tassunga tunngatillugu apeqqutit makku akineqaqquagut:

2) *Periaasissatut pilersaarummi tassani nunatsinni namminersorlutik suliffeqarfiutillit toqqaannartumik unammillerneqarnerannut annertusaataasunik imaqarpa? Taamaassimappat suut pineqarpat?*

3) *“2016-ip tungaanut” pilersaarummi niuernikkut ingerlatat suli annertunerusumik avissaartinneqarnissaannik pilersaaruteqartoqarpa, taamaaliornikkut niuernikkut ingerlatat ersarinnerulissutissaannik? Assersuutigiinnarlugu Polar Oil siunissami immikkoortortatut namminersortutut inissinneqarsinnaanera, taamaalillunilu inuiaqatigiit ineriartortinneqarnerannut toqqaannarnerusumik peqataasinnaangortillugu, soorlu iluanaarutinit inuiaqatigiit pissarsisarnerat annertusarneqartussanngorlugu?*



ATASSUT INATSIARTUNI

4) *Nioqutissaleriffimmi amigartoortarneq annertoorujussuaq mumisinniarlugu pilersaaruteqartoqarpa?*

Stabe tassaavoq KNI A/S-ip ataani ingerlatseqatigiiffiit ataatsimoortumik allaffissornikkut aqutsisoqarnikkullu ingerlatsiviusoq, matumani Pilersuisoq, Pisisa, Neqi A/S, KNI Engros aammalu Polaroil ataatsimoortumik sullinneqarlutik. Stabe-p ilaatigut isumagisarivaa aningaasatigut aqutsineq, HR, IT-lerineq aammalu ingerlatseqatigiiffiit pisortaaneqarfiattut.

Stabe-mut tunngatillugu makku akineqassasut kissaatigivagut:

- 5) *Ingerlatseqatigiiffik 2012-13-mi ataatsimoortumik 18,3 mio. Kr.-inik sinneqartoorsimavoq, sinneqartoortutillu taakku KNI A/S-ip ataatsimoortumik angusaanut toqqaannartumik KNI A/S-ip angusaanut tamakkiisunut naatsorsuutininut ilanngunneqarput, qanoq ililluni qulakkeerniarneqarsimava ingerlatseqatigiiffiit ataasiakkaat aningaasatigut kaaviiartitsinerisa agguataagaanerat eqqortumik takussutissiinersoq, matumanimi naatsorsuutigineqarsinnaassammat ingerlatseqatigiiffiup ataaniittut ingerlatseqatigiiffiit akornanni qanoq inissisimasoqarnera pillugu naatsorsuusiortoqarnissaa eqqanaarniarneqarsimassasoq?*
- 6) *Stabe-p ingerlanneqarneranut aningaasartuutit immikkut ittut, matumani pingaartumik qarasaasiatigut ineriartortitsivik IT-Udvikling aammalu avataaniit sullinneqarnek pineqarput, aningaasartuutit pineqartut ingerlatsivissuup ataaniittut ingerlatsiviit tamarmik sullinneqarsimappat, imaluunniit ingerlatsivik ataaseq arlariilluunniit pineqarnerlutik, taamaassimassappallu sorliit pineqarpat?*
- 7) *Qanoq iliornikkut KNI A/S-ip eqqanaarniarsimavaa ingerlatseqatigiiffiit assigiinngitsut akornanni immikkut ingerlatsisussaaneq isumagissallugu, taamaaliornikkut Uuliamik pilersuiffiup Stabe-mi, ingerlatsivinnilu allani, matumani Pilersuisumi, Pisisa.gl-mi, KNI Engros-mi, Neqi A/S-mi aammalu Polaroil-imi ingerlatsinermut aningaasartuutit tamakkiisumik ilaannakortumilluunniit matussusersimangikkai qulakkeerneqarsinnaava?*
- 8) *Inuiaqatigiinnut iluaqutaannginnerpaassannginnerluni, ingerlatseqatigiiffiit qanorpiaq ingerlanneqarnerisut pillugit ersarissumik ingerlatsisoqarnissaa qulakkeerneqarpat, soorlu pisiniarfinnik ingerlatsineq immikkut ingerlanneqalerluni aammalu uuliamik pilersuiffik immikkut ingerlanneqalerluni, taamaaliornikkullu qulakkeerneqarluni Polaroil KNI A/S-ip*



ATASSUT INATSIARTUNI

pisiniarfiisa aammalu internetsikkut pisiniarfiata ingerlanneqarneranut

“tassanngaannartumik” aningaasartuutigisariaqalissanngikkai?

- 9) *KNI A/S-ip 2012-13-mi naatsorsuutaasa ilusiligaanera qissimissagaanni, ilaatigut immikkoortoq 15-mi naatsorsuutit nassuiarneqarneranni, ersarilluinnarpoq Polaroil-ip KNI A/S-ip immikkoortortaasa imminut akilersinnaasutut ingerlanngitsut amigartoorutai matussusersimagai, immikkoortut taanna aamma ersersinneqarnerusinnaagaluarpoq, ingerlatsiviup Stabe-p naatsorsuutit ersarinnerusut ammanerusullu suliarisimagaluarpagit, aningaasartuutit ingerlatsivimmut tassunga atorineqartut ersarinnerutinneqarlutik aammalu ingerlatseqatigiiffissuup ataani ingerlatseqatigiiffinnut naatsorsuutit ersarinnerutinneqarlutik. KNI A/S-ip ataatsimoortumik ingerlatsinerani aningaasartuutit ataatsimoortut qanoq amerlatigippat, aammalu aningaasartuutit ilai qanoq amerlatigisut ingerlatseqatigiiffissuup ataani ingerlatseqatigiiffinnut tunngappat? Aggvaqatigiissitsineq qanoq aalajangersarneqartarpa?*

KNI A/S-ip pigisaa internetsikkut pisiniarfik pisisa.gl KNI-p tungaanit pilersinneqarmat, Pilersuisup pisiniarfiini nioqqutissanut nerisassaangitsunut quersuarnut pituuttorsimaneq annikillisarneqassasoq siunertaavoq. Tamatumalu ilutigisaanik KNI A/S-ip nunaqarfinni avinngarusimasunilu pisiniartartuinut nioqqutissanik, pingaartumik inuussutissaangitsunik, assigiinngisitaarnerusunik toqqagassaqartitsinissaq aamma siunertaalluni. Maannakkutulli ingerlasoqartillugu Pisisa.gl “Kalaallit Nunaata tamarmi” niuffaffiattut inissisimasut oqaatigineqartariaqarpoq, tassami illoqarfinni assigiinngitsuni aammalu nuna tamakkerlugu tusagassiuutini kiisalu ilaatigut Air Greenland A/S-mi internetsikkut niuerfik pillugu annertuumik ussassaarisooqarpoq. Taamaalillunilu inernilerneqarsinnaavoq Pisisa.gl illoqarfinni anginerusuni aamma toqqaannartumik unammillilersimasoq.

Tamatuma malitsigisaanik Pisisa.gl-ip siunertareqqaagaa innersuussutigalugu ullumikkullu ingerlatsinera pillugu Naalakkersuisunut makku akineqaqquagut:

- 10) *KNI A/S-ip tungaaniit piaaraluni illoqarfinni anginerusuni tamani ersarissuunissaq toqqarneqarsimanerluni, imaluunniit periaasissatut pilersaarut akuerisaq naapertorlugu taamatut ingerlatsisoqalersimava?*



ATASSUT INATSIARTUNI

- 11) *Pisisa.gl-imut tunngatillugu ingerlatsinermut aningaasartuutit qanoq amerlatigippat:*
- a) *Ataatsimoortumik*
 - b) *Sulisunut aningaasartuutit*
 - c) *IT-mik ingerlatsinermut*
 - d) *Piseqqusaaruteqarnermut*
- 12) *Illoqarfinni Pilersuisoq-p najuuffiginnginsaani piseqqusaarutitut aningaasartuutit qanoq amerlatigippat?*
- 13) *Ukiumut sinneqartoorutit/amigartoorutit qanoq inissisimappat? Amigartoorluni ingerlatsivik ingerlasimappat taava KNI A/S-ip niuernikkut ingerlataanut allanut tunngatillugu qanoq matussuserniarneqartarpat?*
- 14) *Niuernikkut ingerlatsiviup taassuma ineriartortinneqarneranut atatillugu aningaasartuutit qanoq annertutigisimappat, tassungalu atatillugu nunatta iluani suliffeqarfiit allat namminersortut tamakkiisumik ilaannakortumilluunniit pilersuisussanngorlugit inissinniarneqarsimanerlutik?*
- 15) *Aningaasaliineq ataatsimut isigalugu nunaqarfinni illoqarfinnilu avinngarusimasuni imminut kaaviiartittumik ingerlatsisoqarpa?*
- 16) *Pissusissamisoorpa Namminersorlutik Oqartussat ingerlatseqatigiiffiutaat niuernerpalaartumik unammillerluni ingerlatsissappat, illoqarfinni namminersorlutik pisiniarfiutillit namminneq aaqqiissut taanna isumagisinnaagaluaat?*
- 17) *Ineriartortitsinermut ingerlatsinermullu aningaasartuutit tassunga tunngasut qanoq annertutigisut ataatsimut ingerlatsivimmi Stabe-mi isumagineqarpat?*